

QUÆSTIONES DISCUTIENDÆ
IN
COMITIIS OXONII HABITIS IN HONOREM CELSISSIMI PRINCIPIS
G U L I E L M I H E N R I C I
PRINCIPIS ARAUSIONENSIS,
NASSAVIÆ COMITIS &c.
Decemb. 20. An. 1670.

An Bruta sint Machinae? Neg.

Succussantis Equi Sella ingeniosa, totum
Cernis ut arte novâ molle retexit iter.
Laomedontæ prospectat mænia Trojæ,
Nequicquam Argolicis Bellua fæta dolis:
Hæret adhuc, pigroque infixa est robore terrâ;
Quamquam centenis est animata viris.
Eia age rumpe moras Monstri fabricator *Epeæ*;
Instruat artifices glauca Minerva manus.
Jam ratio inventa est, ut Ephippia pergere possint:
Tu facias tandem, pergere possit Equus.

EN novus Automaton demonstrat Dædalus Orbem,
Sed quale à tergo Gallicus Erro gerit;
Capsam aperit, bruta incipiunt circumacta moveri:
Quà mens assistens Cartesiana rotat.
Innuit; en notos repetunt festina labores:
Mox iterum digitis innuit; alta quies.
Accipiunt animas Pupæ, ponuntque latentes;
Parturit innumeras vitæque morsque vices.
At quorsum aptantur rigidi libramina ferri,
Atque Ariadneis conscia fila rotis?
Parce supervacuis jam tandem Dædale curis,
Scilicet ipse audis doctius Automaton:
Ne populi emungas loculos; absente coronâ,
Te ostentes Pupis, machina & ipse, tuis.

An Ratio boni & mali sit æterna & immutabilis? Aff.

Si virtus, pietasque, & cœlo debita Proles
Religio, terris stemma genusque ferant:
Frustra, *Epicure*, tibi vasta intermundia condis,
Quæ fulta à nullo, sunt ruitura, Deo.
Nequicquam tibi vina paras, aut nectare multo
Prolueris; genii cultor & ara tui.
Sed tamen ut cœco volvatur turbine Mundus;
Et fædum toto regnet inane polo:
Tu saltem agnosces mortalia numina Reges;
Et gladius vincet tela trifulca Jovis.
Cœlorum Artificis facile est contemnere fulmen;
At qui jura creat, sanctior ille Deus.

FRangere colla Patris vetuit lex nulla *Lycurgi*,
Pro lege ipsum ingens credidit esse scelus;
Si foret *Hobbistis* Lacedæmon Patria, matrem
Nec vidisset anum, nec senuisse patrem:
Cæde locos implent, ubi nulla repagula legum;
Tales ni clausas credimus esse feras.
Hæc boni leges tibi cum præscripseris, *Hobbi*;
Fingendo infernum tam leve, cautus eras.

Resp. M^{ro} Old ex Aede Christi.

Opponent. { *M^{ro} Russell è Coll. Magd.*
 { *M^{ro} Porter è Coll. Trin.*